

普陀山志

重修南海普陀山志卷之十四

粵東歸善黃應熊飛渭參定

古閩同安許琰瑤洲編輯

法雨住持釋明智法澤校訂

藝文

山以佛靈而非有名勝則不足以發歌咏文以人重而非有佳作則亦不足以辱泉林苛而刪之濫而登之兩均無當也昔之讚頌玄宗失於誕幻今之揄揚緇侶失於張夸徒令悲仰者轉生厭數耳蒿艾灌莽亦拈而嗅之曰此故佛地琪瑤也可乎哉錄其雅馴

者文如千詩如千讚偈附焉佛國神州其亦不寂寞也矣志藝文

歷朝

磐陀石觀日賦

以下元

吳萊

粵東游於海徼兮得偉觀於陽阿登磐陀之疊石兮
路畏縈而巍峩天鷄號而夜半兮噉欲出於重波恍
玄幕之垂黑兮惛火輪之盪摩緬羲和之有御兮扶
木燁其將華渺暘谷之不可以里兮屆高春其幾何
嘆世寰之安在兮尙昧冥而未旦覩帝車之斜迤兮
耿星宿於霄漢漸島嶼之舛鮮兮益森茫而瀾漫恐

閼閼之猶爾夢寐兮類蜚蟲之惛亂明乾極之牽掣

兮儼機軸之翕張固陰泉之歛炯兮煥燿燧之奮颺

煒跋烏之燿烜燦爛兮渴啄解羽藐以迭遶遶平聲迭出張平子思玄賦舊志作

錫非寧波府志作甚錫更非或有燭龍之燬炳燭昱

兮熾額燭目頌其方驤懸燿鏡之熒灼炭燔兮鮫人

泉客剗濯有光振頽鼓之焱燼炫輝兮比若壁壘嶽

嶙前行指彩虹之抱戴珥璫兮璀璨燿燿燿燿見靈光賦燿音

明舊志綯綯通皇想朱鳥之次舍軌度兮豁達轡轢

轡音各轡轢即較轢也舊志作蘭誤閼閼閼音遐作何聲燿鉉乘寒滂潮

水之偵倒推盪兮散曉赧赧音遐赤氣也古亦作霞字在此則當作赤氣解

霞氣之輶輶彩章乃飛騰於寥廓兮竟睽眴於混茫
縈高抗乎氛曠兮僅啓明之獨燦歟遠麾之廣燭兮
遽羣動之盡躩川后潛精而窟藏兮海童覲耀以聳
煬蛟鼉揚鬚撥鬣以悠漾兮鴻鶴刷毛挾翅而陵薄
莽瑯琊之躋臺兮泐鯨山而畫其燮也間羅浮之矚
井兮混蜃穴而夜其爚也迅夸娥之杖策兮懼追逐
而莫之跳遶也怒魯陽之揮戈兮怪盤礴之弗吾規
襲也惟圭臬之可測兮奈隙駒之焉託恒鞠明而究
瞳兮遂壯凋而老鑠昔聖賢之有法兮實蓋渾之同
天矧鍊石而凝質兮復斷鼇而鎮淵將渤澥之鑿竈

兮淪谷底而迭然抑崑崙之嶠峙兮繞巖腹而互旋

豈文身黑齒之俯邇所出兮貫裸壤以相連或崦嵫

濛汜

崦嵫山名日所入濛汜水名日所次舊志作淹滋誤

之遠歷所沒兮罄八

國之窮壤歎嚴冰與飜雪兮曠古莽之鮮覺常眠惕

重蒸與叠熱兮炊炎邱之毒瘴霾烟諒衆人之憺慙

兮

憺慙心昏亂也作憺慙誤

持蜂蟻之撲綠偉小兒之辨知兮雖

睿哲而弗宣彼凡俗之多故兮遇曙朝而卽竟誠旦

晝之枯亾兮嚮晦昏而暫定紛士學之攘爭兮集農

商而捷競淫末作以相資兮侈利心之百宰儻柳榆

之不復滅沒兮盡奪時而力政願鬱儀之恒若溟滓

兮庶保躬而固命跼曉籌

周禮夜擘旦以跼百官舊志作器誤

而始闢

兮警宵柝而告靜信舉筴而豫知兮幸聞鐘而深省

何觀瞻之不足兮重徙倚以盤桓光已通於一躍兮

影奚侯於三竿逮眉浪之畢露兮屹東霍之巖巒念

列仙之獨往兮扼羨門於波瀾劃孤嘯而陟降兮撒

蒙郝以欣歡顧秦越之邈不相及兮又焉論夫遠近

乎長安

按賦之聳牙自是一體以其不便於讀而刪之又割裂而刪之失其義矣裴志陳志刪節

不同今槩依舊志全錄而畧釋其字之疑難者如此

甬東山水古蹟記 節錄

前人

東到梅岑山梅子真煉藥處梵書稱補陀洛迦山也

華言小白華山自山東行西折爲潮音洞洞瞰海外
巉中裂大石壁紫黑旁罅而兩歧亂石如斷圭積伏
蟠結怒潮聳擊晝夜作魚龍嘯吼聲又西則爲善財
洞峭石嚙足泉流滲滴懸纏不斷前入海數百步有
礁土人云曾有老僧秉燭行洞穴且半里山石合一
竅有光大如盤盂側首覘之寬引潔白非水非土遠
不辨涯際又自山北轉得磐陀石山麓怪益高疊石
如埵東望宵宵想像高麗日本如在雲霧蒼茫中日
初出大如米篩薄雲掩蔽空水弄影恍若鋪金僧伽
黎衣或見或滅南望桃花馬秦諸山嵌空刻露屹立

巨浸如山疊太湖靈壁不著寸土尺樹天然可愛

昌國州寶陀寺記

劉 賡

翰林學士

國家自世祖奄有四海凡名山大川仙釋所託以神其教者畢乘輿運鉅利珠庭天降地湧蓋於以揚前人之休光行萬世之慶澤浙東慶元之昌國有山名補陀洛伽者奇巒複嶂幽洞靈巖錯立層出奔波駭浪之中潮汐吞吐煙霞變幻虬龍鼉鼉蜿蜒呵護華嚴經所謂善財二十八叅觀音菩薩與諸大菩薩圍繞說法卽其地也寺曰寶陀創始於宋元豐間爾時靈蹟率隨緣影響示現香花與五臺峩峩道場實類

而旱潦風濤之禱響答爲尤捷其在東南故是佛法
一大海會亡論遐邇早尊靡不皈瞻皇后福德日盛
崇尙至教大德二年春特命中御府臣李英驛降御
香使還再命修繕像設明年春宿衛臣李羅等再治
祝香內出中金百兩飭江浙行中書省遣寮吏同涖
其役又明年春更命宿衛臣魏也先太出馳香飯僧
周閱具典竣事寺之長僧如智如律奉玉琢瑞相表
上內庭以便瞻禮具歸美報今年春仍命太出偕李
鐵木兒不花魏也先持五綵旛旌莊嚴法筵又出內
寶幣三千緡卽其寺治演法之堂暨廬舍之圯腐殘

剝者又飭行中書省捐土田之在官者二十頃畀之
益其徒食俾每歲以建寅午戌月諷誦祈禱又下璽
書復其凡隸寶陀者非寶陀者毋得匿冒如智亦因
得被袈裟內庭傳瑞流恩會無虛歲至是命翰林臣
作文貞石以垂永久臣謹銓次如右切謂象教之來
中土雖顯晦靡常其所獲驗亦不專繫夫崇奉敬怠
聖天子以寬簡治民而賢王復以慈祥佐理與往聖
覺皇同符共貫是宜圖精薦釐方圻效祉至若金湯
迦維亦曰我國家之常事其所以延續延洪之道自
有大本大原在也因明其所在而繫之以詩曰皇元

混一其仁如天好生惡殺慈視竺乾帝繩祖武仁守
大寶曰臨曰御書循堯道后嗣徽音所寶惟慈力行
萬善念茲在茲繫我補陀法云真際白衣如來東漸
南被如來大智無古無今慧日滿月無不照臨天開
崇因祠香歲致應復爲感匪除匪亟布金檀幣卽而
招提舊仍新就離立翬飛僧智表陳如來照晰玉琢
妙巖象其光潔補陀非遙浙水之東法身圓對奚必
梵宮教旨崇之勝旂是錫申畫沃腴益其香積俾勤
梵唄爲國禱祈歛時五福敷錫靡私誕降璽書以鎮
以護山河大地等爲樂土恩德新覃震耀無前帝仁

后慈億萬斯年惟觀自在非聞非見圓通融性神光
畢現優曇鉢花瑞應孔彰皇圖釋網相爲無疆詞臣
承命頌述其職揆厥本原懋昭大德

補陀洛迦山考

龜茲
盛熙明

九州之山川具載於書傳山海之詭奇亦見於圖記
其來尙矣謹按補陀洛伽者蓋梵名也華言小白華
方廣華嚴言善財第二十八叅觀自在菩薩與諸大
菩薩圍繞說法蓋此地也然世無知者始自唐朝梵
僧來覩神變而補陀洛伽山之名遂傳焉盤礴於東
越之境窅茫乎巨浸之中石洞嵌巖林巒清邃有道

者居之而阿蘭若兆興焉似非好奇探幽乘桴浮槎
者罕能至也惟我皇元際天所覆均被化育梯航所
及靈跡悉著至於茲山瞻拜相繼肝嚮昭荅不可勝
紀矣然圖志脫漏言辭庸謬四方何傳僕頃因謝病
偶在海濱恭叩靈躅旁按經籍首集自在之功德繼
考洞宇之勝槩若夫由心所見光景斯彰因緣有待
廟塔興建具載於篇能遊目者不起於坐飛神於大
方之外當知清淨光明廣大悲心與菩薩無二推惻
隱之端躬行於日用之間非徒空言也倘欲南詢亦
必問津於此而與善財同乘般若慈舟共達毘盧性

境入海印之三昧證大悲之法門圓解脫之深因滿
普賢之願海普令法界含生盡登菩提彼岸者豈虛
謬哉

補陀洛伽山在東越之大海中望扶桑日輪湧出
水底咫尺間金光絢赫五色敷瑩泰山日觀不足
奇也大士觀音坐此道場自始興迄今無片文隻
字紀錄以垂考證龜茲盛熙明氏既來遊息卽事
爲文中具四品其一以梵語譯華言言菩薩功德
也其二以山川地里言言奇蹤勝槩也至於三四
則以歷代官民祈禱靈感與夫今朝之視釐麥予

言言所崇信莊嚴也

四品文辭多不雅馴前志俱不登載但節取入各門類內

熙明生居西域世與佛隣善誦佛書深達梵語故於楞伽秘密之典傳習小白華之事不啻若自其口出矧於身親炙之而不敷揚演說其詳乎近地有號安期鄉蓬萊都者景物歷歷可翫意者秦皇漢武爲聲聞所誤倘得見之亦何有海上別爲神仙之求耶熙明所述爲不誣住山僧睿上人以其傳來請誌是亦東南一偉觀也故書以遺之天台劉仁本題

補陀山碑記

以下明

魯王

神州之內有三大山爲震旦佛國曰義脣曰五臺曰洛伽而洛伽獨在東南鉅海中爲觀音大士現真聖界鴻波怒濤萬里極目寰中自垂髻黃髮赤鬚白足罔不蹻躡聚糧梯危絕徼奔走香火者而大士靈真玄鑒隨力大小緣厚薄誠淺深輒應之蓮花寶蓋玉節珠幢時時見雲濤中或洞壑巖岫恍惚出沒靈異萬狀以故見者傳聞者思至者結茅來者繭足欲一覲大士聖秘拯萬劫之迷途闢無方之朗照歲丙戌仁聖皇太后慈聖皇太后拱念靈庥賜經一藏遣中人賫送海上而皇上復爲文明著聖母至意碑勒在

寺予不敏葢篤慕之廼無由一望洋而禮而歲輒致
米飯大衆近復鑄赤金像一座重三十石送新殿敬
祝嗟夫觀音力鴻鉅周浹大極須彌小入嚮名願予
何人敢以一念邀惠大雄力哉惟聖母厚德載物皇
上玄祐彌天大士寔陰隲之禔福海內予譬飮河知
滿戴天思報天何言哉寺僧真表有戒行其詣京恭
謝亦過予予甚器之夫天下事大不偶明州故三佛
地而補陀復賜經顯於天下光於萬世予與表何幸
躬逢遂畧記其事以告後來萬歷十五年丁亥十月
孟冬立石

清淨境亭銘

有序

金華

宋

濂

翰林學士

補怛洛伽山者在東大洋海梵語補怛洛伽華言小白華傳云山有二皆觀音大士示現之地其一自西竺歷羅刹鬼國暨諸魔土始至其境其一卽華嚴大經所說善財南詢之處蓋今所也山絕起海中周圍僅百里滿望冥茫無際翁洲遠山隱隱天外如青螺幽閩遼復不可名狀寶陀禪寺在山南去寺三里至潮音洞洞脚挿海張願欲飲怒風驅濤進退擊衝洞顛通穴曰天窓白光注底如月唐大中間梵僧拜洞前燔十指禱之指且盡大士爲現身說法授以七色

寶石自後人以誠感輒應或現紫金自在相縞衣縹
帶珠璣紛然或現千首千臂護法大神翼衛後先稍
轉而右爲善財洞嵌巖中坳窈黑不可測外則峻巖
壁立泉氤氲滴下如珠名菩薩泉善財時現黛目粉
面寶蓋華鬘皆明潔可指數從洞折而北有石類香
爐類佛牙奇甚惟磐陀石上最寬平可坐百人雞初
號遙見扶桑五色光發照東方盡白久之湧出日輪
赤如火流光燭海波閃爍不定或輕煙明霞左右虧
蔽愈致妍麗誠奇觀也自石折而西有獅子峯有象
巖有佛手峯皆以其形名有三摩地嘉木櫛森怪石

駢列卧者離立者蹲欲起者迎躍似舞者其他勝槩
難可數計大抵山在海岸孤絕處重巒複嶂蒼翠如
洗紫葳白葩濯濯滿地山丹樹高數丈絳花繞枝鮮
澤如珊瑚林金沙四布璀璨眩目海水震盪無雲自
雷登高四顧若寘身琉璃瓶中一髮塵土不得相侵
誠霄壤間勝特之境也洪武庚戌春正月部使者顧
州劉君承直與寶陀大師行丕抱杖西東遊使者曰
此清淨境也盍爲亭大師乃建於寺之南嶺上從三
十尺衡如之左倚山右入潮音洞云予聞西方國名
淨土纖穢不存以黃金爲地寶樹重重伽陵頻伽能

演妙法人思至之有不能得豈意東海之區清淨之
境爲近之耶是宜大士顯靈於其地也大師字大基
行丕其名勤人也宗說兼通行解相應蔚爲時之名
僧初由佛隴昇主是山匡衆說法恢復產業振興乎
叢林席者非茲之可備載故畧而不書銘曰大海東
滙厥名維瀛并包川洛混合坤經鯨波四繞龍島中
停濯濯綠淨皦皦青縈片滓弗立纖塵不驚如蓮出
水類鑑含明流雲歛翳新旭爭熒金沙布地寶樹森
屏巨石佛足嵌洞潮聲大士顯瑞梵童揚靈仙帶翻
縹玄珠垂瓔月相穆穆颺馭冷冷龍君持戟水伯捧

旌衛茲勝特控此高冥倬彼開士爰謀建亭莫平匪
砥有覺惟楹直遡寥廓將齊撓寧塵因道寂境逐心
清徜徉淨國周流覺城敢告來裔庸勒新銘

重修寶陀禪寺記

稍節

鄞邑

汪

鏗 尙書

明郡當溟渤之會其東屬邑曰定海補陀山在定海
外二百餘里遠望之滄茫杳靄隱見明滅佛書稱補
怛洛伽山海岸孤絕處是也海天孤濶洞府幽深波
濤際空茫無畔岸煙霧晝冥四景若一倒影凌虛排
雲御風誠上聖之窟宅宇內之奇觀也自梁日本僧
慧鑒創建梵宇馮依佛乘宋元豐間賜寶陀寺額歷

代因之崇尙不廢至我國家益加尊禮於戲盛矣維
我觀音大士通明圓覺神應變化利生開迷不可殫
述故能使百千萬億人無貴賤賢愚傾心歸向每於
春月卽洞中叅禮求現而王侯妃嬪貴戚貂璫薦金
寶以致誠懺悔愆以祈宥使者冠蓋相屬於道然乘
筏渡海觸犯風濤竟無濡足之患則證應從可識矣
嘗聞故老說補陀佛屢著靈異往往現金色身照耀
天日青蓮擁瑞天樂發音百靈秘怪恍惚呈露噫亦
異矣嘉靖癸丑島夷犯順據爲巢穴軒構摧圯緇錫
解散國朝勅賜碑文俱斷裂什海中所僅存者獨聖

壽寺琉璃無梁等殿梵音虛寂鼎篆塵蕪者垂數年
然教不終否有五臺龍樹寺僧真松北遊來京師聞
其事於禮部時宮保大學士養齋嚴公爲大宗伯亟
下郡縣俾給劄住管崇奉香火而演律儀以資景福
靈山勝會一旦光復自非我公其能洽和幽明興舉
廢墜如是哉維時郡侯太恒吳公總戎草堂劉公相
與協贊規畫次第修舉一號令之餘而改觀易聽矣
適御馬監太監松菴馬公景慕名山起心發願迺範
金成佛繡綵結旛不惜重貲歸誠於佛一時輻輳增
重叢林豈非事有待而化有緣耶而我觀音佛法力

冥助神功默相誠不誣也聞茲靈異普濟羣生其俾
我四方息警雨暘時若灾厲不興物生蕃阜環海內
外斷惡崇善佑我邦家用臻康乂則百千萬年永賴
洪庥酬德報恩寧有紀極鏗生長海濱習聞靈蹟且
身享康寧濫竽祿位母氏年踰大耋高堂無恙藉此
福德敢忘厥自故因真松之請不諱鄙陋爲文以紀
其事而復系之以詩曰縹緲靈山嵯峨積石廻抱滄
溟吐吞潮汐石洞峭深瓊泉滴瀝爽氣飛揚囂塵斷
隔佛祖壇塲天神窟宅昔我觀音來自五臺覩茲靈
境息駕徘徊梵宮夜敞寶刹朝開金容璀璨廣樂喧

厯星繁電燦倏往忽來自昔稱奇於今爲烈貝影扶
踈蘭缸明徹百千萬人無論愚哲向山歸禮嘆水致
潔蠶爾醜夷據爲巢穴几席荒涼棟宇摧裂道無終
否感則必通卿士協吉上下和同垂增雲構宏闡佛
風燕還舊壘僧依故宮光復盛美伊誰之功維我觀
音慈悲成性我願衆生咸歸清淨聖壽綿延帝圖昌
盛默佑陰扶永綏吉慶勝水名山萬年輝映小子顙
蒙稽首歌詠

遊補陀洛伽山記

雲間 侯繼高 總兵

補陀洛伽山在海岸孤絕之地爲觀音大士說法道

場自唐以來崇奉恐後余世家海上少小時聞長老
言輒心慕之及膺世資奔走不暇自謂佛地無緣可
到往歲猥蒙聖恩濫鎮全浙春秋二汛提師督哨涉
歷海洋遂於丁亥之春肅謁大士於寶陀禪寺願慰
平生歸欲搦管記其事錄錄未遑也茲歲春復當大
汛乃於季春甲申朔考鉦戒行乙酉出蛟門過金塘
晚抵螺頭港叅戎吳君亦帥舟師來會詰旦抵舟山
與吳君入城一閱丁亥過青雷頭山自青雷以前千
山萬島莫可勝記又前爲石衛門蓋數峯崛起潮汐
經流旁午其中爲十六門故又呼爲十六門云我舟

從中門行廣僅可容偏船兩旁石齒齒立亦險要處也戊子出沈家門風雨交作舟不能前已丑昧爽風頗利航往如馳須臾過蓮花洋卽抵補陀矣由短姑道頭從陸行二三里至寶陀禪寺瞻禮大士於是縱步遐矚峯巒錯峙若起若伏雲霞往來頃刻變幻目不暇接寺前累石爲浮圖曰太子塔蓋元元統中宣讓王施鈔所建也由塔而南徧地黃沙卽所稱金沙灘菩薩示現之地相傳爲紫竹旃檀林者也又約三里許至潮音洞洞石巉巖正瞰大海巔有穴可俯而窺波濤澎湃激入洞中或如洪鐘忽扣或如猛虎怒

號舊有殿宇橋梁可以瞻禮今皆廢其右爲善財洞
巖有罅窺之皆莫可測相傳二洞中菩薩示異秉誠
叩禮往往多見之者余愧武人未離火宅中不敢妄
覲遂復折而東又三四里曰千步沙有僧大智自五
臺山來卓錫於此結菴以居曰海潮菴有樓開牖視
之則滄溟瀕漲近在几席而濤聲訇磕震應巖谷超
然塵世矣菴之後山頂有泉大智命其徒貫竹引之
淪茗味殊甘冽已而日沉沉向暮遂返舟中往余得
吳道子所繪大士像質素而雅近又得閩立本所繪
則莊嚴而麗二人皆唐名手余并勒之於石明發復

詣寶陀植碑於前殿之中於是再遊磐陀石石平廣
可容百餘人俯枕大洋可以觀扶桑日出寺之西偏
石壁旁啓如扉曰天門由天門而入爲三摩地其下
亂石雜立巖洞嶽岑奇形詭狀卽良工不能摹也寺
之深處有真歇石蓋真歇了禪師修道之所真歇之
前突然一石名無畏石形雖方廣而欹側若傾險峻
莫有躋之者獅子石卽在其旁其他若正趣峯靈鷲
峯觀音峯皆望而覽之不能盡陟而蒲陀之大槩盡
此矣嗟乎金仙靈異示現於梅岑者千有餘年歷代
崇奉愈久愈盛一旦東夷不靖竟爲鯨鯢窟穴當事

者遂奉其像遷之招寶而悉燬其廬殆佛家所謂劫
數者非耶尙賴君相威靈廟堂石畫島人殄滅海甸
肅清佛法常明教不終否於是嘉隆之間有五臺龍
樹寺僧真松飛錫而來大唱宗風復興勝果邇年以
來大倍曩昔矣恭惟我聖母慈聖皇太后刊印藏經
并範金爲像繡綵結幡命太監張公少監孟公齊捧
勅書賚錫於茲煌煌寵命悉勤貞珉猗歟盛哉雖然
衣衲之戒復隍之虞聖人垂訓至深且切吾輩世受
國恩職司戎務其可不兢兢惕惕夙夜靖共以無負
國家設兵爲民之意歟庚寅復出外洋抵桃花山欲

訪安期生煉丹之所人無識者余乃復乘走舸徧歷
山外大洋而返夜半風雨陡作辛卯不止所坐戰艦
如輕鳧拍浪泛泛水中從者食輒散余更加餐迨夜
風少定余有事欲暫歸關上遂別吳君壬辰未旦命
挂席舟卒告曰風不利請少遲之余曰汝第往遂行
質明風果迅未及丙夜已抵招寶蓋自桃花至此計
程四百餘里矣癸巳入鎮治庭前人散援筆書之爲
遊補陀洛伽山記時萬歷十六年戊子季春十日

纂脩補陀山志序

前人

勝國時盛熙明氏以西域之齋深通秘密之典廻著

補陀洛伽山傳分爲四品由是菩薩之功德山川之
奇勝與夫歷代祈禱祝釐之虔應感靈瑞之異彰彰
較著矣然而卷帙陋小流傳未布使天下通都大邑
道里遼曠嚮慕而不可至者卒弗獲一展卷而卧遊
焉且今之叢林自往年倭亂之後廢而復興已非昔
日之舊其沿革又不可以無志也余不佞承乏來浙
涉歷海洋首謁大士於補陀周覽之餘問寺僧山有
志乎始出熙明著傳則紙敝墨濡幾成蠹簡矣蓋熙
明至今已二百三十餘年其四品所載亦大都爾入
我明來香火益崇著述益富迄今無有紹熙明而爲

之傳者余喟然曰名山巨刹旣不可無載述以示於
後況今聖母慈聖皇太后刊印藏經而我皇上純孝
承志勅遣內使齋經降香來錫寶陀余旣勒之貞珉
與茲山並峙矣於此又烏得無志謀於海憲潛山劉
公公以屬之郡大夫武陵龍公曰必儀部屠長卿先
生也乃就而請業焉不數時彙次成帙而不佞乃申
一言於末簡夫世之儒者諱不言佛若戎臣武士又
輒詎威京厭愛與慈悲之旨弗類以愚思之佛之大
端以慈悲爲體以化導爲用其要使人人趨善而背
惡爾孟子曰以不忍人之心行不忍人之政非慈悲

之謂乎孔子曰已欲立而立人已欲達而達人非化
導之謂乎余武人也龕鄙弗學顧平日耳剽先生長
者之言而知驅惡而使歸於善除逆而使效乎順是
真有味乎慈悲化導之旨者况觀熙朝盛典而不樂
觀此志之成也哉茲歲仲春余督哨海洋舟過補陀
禱大士曰我佛靈赫尙克相余俾我師貞吉少效尺
寸以上報天子未幾倭奴竊發窺我邊界皇威丕震
我是以有花腦浪岡之捷謂非大士默相之功可乎
志成適有此役因并記之時萬歷己丑夏五月既望

補陀洛伽山記

稍節

鄞邑

屠

隆

禮部主事

東海補陀洛伽山者釋言海岸孤絕處又言東大洋
海西紫竹旃檀林華嚴言善財第二十八叅觀自在
菩薩圍繞說法蓋震旦中國第一道場也由明州城
桃花津六十里至候濤山下是爲海門東航海抵翁
洲洛伽山周圍百里四際無岸孤懸海中穢土刳塵
邈焉隔絕遠近諸山大者如拳小者如栗三韓日本
諸島青螺一抹杳靄烟際乍有乍無微風不動天鏡
涵空澄碧萬里驚濤下撞洪濤上春銀山雪屋簸蕩
天地五更望日出扶桑巨若車輪赤若丹砂忽從海
底湧起精光萬道散射海水奔鮮煜雪晃耀心目吳

淵潁謂空水弄影恍若鋪金僧伽黎衣尤極形容奇
哉觀也山上寶陀禪寺奉觀音大士上自帝后妃主
王侯宰官下逮緇侶羽流善信男女遠近纍纍以不
函經捧香搏顙繭足梯山航海雲合電奔來朝大士
方之峩峩五臺有加焉江津海浦風濤覆舟哀空侯
酌波臣亾時亾之獨洛伽慈航乘潮穩渡開山以來
絕不聞有顛危之險自非勝力默持慈心垂祐胡能
然矣而衆生之朝禮皈依者往往示現金身瑞相白
衣縞帶雲幢寶珞香花勝鬘時時有之唐宋累朝咸
知信向至我皇代益以尊崇今上奉聖母皇太后命

印經範像宣揚教典穆哉盛矣夫大士道臻無上因
權度化義密教深見聞之妙如響觀成機熟耳目之
用盡融譬之萬波散派元無萬波千月分光止惟一
月嗚呼魑猛獷悍王化之所不能伏而慈氏攝之蔽
錮昏庸師儒之所不能誨而如來導之十方仰賴萬
國欽崇夫豈偶然之故哉

普陀寺募緣疏

前人

原夫現在觀世音菩薩卽過去正法明如來如來是
其證果菩薩乃其權位借果行因已歷經乎多劫開
權顯實爲普度乎羣靈首標千二百功德思脩深於

返聞獨超二十五圓通入流妙於忘所大悲宏願徧
恒河悉作津梁應感隨緣傳空谷捷於桴鼓維洛伽
名山勝地迺大士說法道場靈潮嘯吼孤懸菡萏香
臺空水澄鮮別敞琉璃寶地龍部聽經香繞霞衣少
女天人護法光生電甲長神金燈照夜遙分紫竹於
林端玉殿干霄下映紅蓮於波面八難三途隨呼輒
應下寶筏而力拔之苦海四生六道有感必通秉慧
炬而悉照彼迷方茲可謂衆生之慈父震旦之樂邦
也邇者緇素雜處染淨同居清淨比丘方欲薰修而
紹隆佛法闡提惡種乃敢盤踞而壞亂清規我如來

是用投旨金剛力士屏滓穢而掃除假權回祿祝融
付殿臺於烈焰巢穴一空魔羣之盤踞自散威靈大
赫佛子之懲創必深是父母慈嚴之並用大士折攝
之微權也殿堂盡燼獨金身瓔珞儼然棟宇俱焚惟
關聖鬚眉無恙斯非大發神靈最爲於昭顯灼者哉
戒行僧真宰如廻等痛道場之頽廢慨大法之陵夷
願捐糜以報佛恩將竭力而興西教適皇上遠降鸞
章表信心於中使聖母式頒龍藏將誠意於寶函沐
九重曠蕩之恩洵三寶興隆之會隆竊思佛法懸於
皎日慈光亘古昭明梵宇徧乎名山天神隨處擁護

世界本同火宅非如來之甘露何由灌洒而清涼惡業永被牽纏非慈氏之法門何由放捨而解脫矧大士乃衆生皈依之父比十方諸佛爲最親補陀乃大士說法之場寶萬邦善信所共仰殿宇不設則羣生瞻仰弗尊瞻仰弗尊則凡情向善無路威靈痛折之後沙門之補救宜勤叢林燬壞之餘蓮座之鼎新當亟伏念名山道場度工力旣極其浩大則檀波喜捨此功德亦不比尋常惟力圖之幸甚

補陀後寺開山大智禪師碑 前人

夫妙達性宗開智慧海則解爲朗炬嚴脩佛事入功

德林則行爲宏基心炬不朗則一切作爲總屬有漏
何以燭理而爍羣昏德基不宏則一偏見解徒騁空
虛何以實脩而圓萬德是故局功行而體昧空寂雖
梁武之造塔度僧見呵初祖倚狂慧而行染汙邪雖
善星之精解剖藏難免泥犁經不云乎理因頓悟乘
悟併消事非頓除因次第盡是諸經之總持千聖之
密印也末法衆生明道者多行道者少少室師嘗記
之邇者世智辨聰竄入聖解盲鞭瞎棒動託宗門法
師高登講座戒行不持而曰吾舌吐蓮花縉紳沉身
慾海無業不作而曰我腹有貝葉此適足揚韋馱之

杵奮北鄽之筆爾雲棲師作崇行錄以救之爲慮深
矣補陀海潮寺住持大智禪師靈心朗哲戒德孤高
披精進鎧薰脩翹勤於六時建勇猛幢功行加持於
三寶幼脩梵行尊宿讓而傾心宿種善緣道俗望而
引領曾興峩睂叢林肅震旦之區繼去鑒華雲水寄
巾瓶之迹遂卓錫於洛伽初無一茅蓋頂乃結廬於
巖穴口惟籍草跣趺剪寒雲以補衲衣臞形而禮寶
相挑野菜以當香積枵腹而誦金經孤懸而人跡杳
然山鬼爲吹夜火塊處而潮聲日聒神龍時代晨炊
至德流聞善信漸加物色玄風遐播緇素奔走如雲

遂創精藍莊嚴擬乎化樂虔供大士香火盛於寰區
航海梯山固頂禮乎靈佛重躋繭足亦叅訪乎高僧
雖道宣之棲終南慧遠之居廬嶽一時仰德千載同
風矣按師諱真融楚麻城人不佞旣爲論著又作銘
曰靈海淵沄凌彼窮髮有島屹如浮空孤絕善財東
參大士說法高衲至止鑿巖而居洪濤嘯吼魚龍來
趨四無人跡山鬼與俱片石蓋頂嚴霜裂膚渴則飲
海饑則茹荼砥行良苦翹勤佛事至德不孤歸者如
市遂營梵宮遂奉大士壯擬王居麗如忉利六時行
功僧徒翼翼不肅而嚴如守三尺有威有儀無怠無

數戒壇清規永可爲式一旦西逝幢旛來迎玉毫中
見蓮花上生蛟龍夜泣猿鶴哀鳴師雖化矣遺風故
在我瞻名山僧規匪懈松色經函潮聲梵唄和南禮
佛羯磨講戒浩渺海壖居然法界

纂脩補陀山志序

節錄

前人

震旦國中三大道場西峩峩以普賢北五臺以文殊
而我東海補陀以觀世音西北距佛國不遠道法漸
摩近而且易東海僻在衆阻聲迹荒遐衆生沉淪薰
染五濁如來重愍之茲觀世音之開化補陀津梁娑
竭良有以也峩峩五臺深峭雄拔秀甲神州而補陀

獨立大瀛海中孤絕處尤爲奇特善信航海朝謁大
士肩駢趾錯無論中華卽天竺梵僧亦往往單瓢隻
履間關而至殆無虛日而吾鄉士大夫顧反畏風波
罕登涉者海上文人恒標勝靈區詫奇五嶽託之竹
素而補陀一志獨闕焉乃使大教壅闕外道喧呶則
何貴操管綬文者哉開府侯大將軍乃謀之兵使者
劉公郡大夫龍公纂脩補陀志爰尊今上奉聖母命
頒賜藏經制勅及御製序文冠諸簡端而圖繪山海
巖洞殿宇形勝次第裒集古今名賢制作彙爲一書
復屬道民刪定乃爲稍削舊詩之俚謬增入時賢之

合作者若干篇復以道民所自爲記頌韻語附焉三君子之闡揚教典開迪愚蒙厥功不細詎惟山靈海若欣豫亦如來之所印可也

補陀山志序

稍節

皖城

劉尙志

憲副

流沙以西有崑崙縣圃之罘以東有蓬萊三山赤縣神州名洞天福地者雖可僂指大都爲仙靈托跡獨東海補陀稱佛道場昔襄城鼎湖迹肇軒后包山洞庭秘發龍威柱下苦縣宣尼贊以猶龍清虛冲舉之學實自此昌明焉維時固不聞有能仁氏之教也有之亦伽毘身毒彼國自爲奉行爾西京之東漸流震

旦其道以超脫爲貴以空寂爲宗而獨露靈明謂之
見性吾儒者固嘗昌言排之而高明特達之士往往
褰裳染指焉蓋士方苦世法跼踖而一聞擺落之言
卽豁焉如縛者之得釋士方苦世途炎囂而一領清
淨之旨卽灑焉如暍夫之飲水佛惟以擺落爲言士
之近擺落者易入也佛惟以清淨爲旨士之近清淨
者易入也匪惟無妨於儒亦足助儒教之所不及此
我皇上握符御世闡教明道之意也大哉王言刑賞
所及權衡制之刑賞所不及善法牖之生成之表別
有陶冶矣補陀洛伽之山孤懸大瀛海中空濶廻絕

秀甲神州一躋覽其上輒有馮虛御風超越塵壚之
想不佞猥叨職事仰宣皇上清淨奉道開化德意而
下以牖俗淳風者守臣責也若夫儒佛之理之精者
不佞惡能知則敬以俟當世之大參同君子焉

補陀山志序

武陵龍德孚

寧波同知

補陀震旦一大道場也應感盱眙靈蹟奇聲著於歷
代明州故稱文獻地馳藝苑之名脩伽羅之教者不
乏奈何今始志志而又屬帥臣也君子曰是可以卜
世矣海上島嶼星布碁列引睇三韓日本近在睂睫
國初湯信國請徙而部之內地補陀猶留一僧一价

以奉香火世廟時東夷擾我海壖所過殘破補陀遂
燹於兵居無何汪直俘而海波復寧說者歸之靈貺
焉維時萬歷丙戌七月七日瑞蓮產慈寧宮抽英吐
翹絕殊凡種九日瑞蓮再產宮中重臺結蕙又殊前
種主上大加賞異勅中使出示輔臣圖而詠之於是
聖母勅中使二航蓮花部主法像及續鐫藏經四十
一函並舊鐫藏經六百三十七函直詣莊嚴妙海鎮
壓普門答靈貺而結勝果也主上孝思錫類綸綍宏
宣善信皈依奔走蓋雲合而盆涌焉大德滂漉盛治
邇隆靈貺昭赫固莫盛於今日而帥臣因得優游容

與從事鉛槧揚摧今古有散帙緩帶之風焉且知崇
三寶振禪悅篤皇家之祐培人天之因穆哉侯君羊
叔子曹武惠其流亞耶洛陽興廢卜世盛衰不佞孚
亦於今日補陀之志卜之是亦臣子祝釐之一念也

普陀寺碑記

鄞邑 周應賓 尙書

惟我皇上清寧得一易簡函三垂衣蜎蠖之中馳化
寰瀛之表薄海內外罔不咸熙然猶崇尙西方清淨
慈悲之教用裨理道萬歷己亥乃遣御馬監太監趙
永頌藏經於東海普陀寺俾供奉之蓋聞震旦之國
名利有三文殊治五臺普賢治我睂觀音治東海而

東海靈應尤異以是皇上特垂意焉維時寺燬於火招提未立永具以聞上乃遣人閱視故址頒帑金一千兩鼎建藏殿仍令舉內侍中忠勤幹敏堪任茲役者左右以御用監太監張隨爲對上遂命之甲辰三月藏殿告成隨報命繪圖以獻上悅而資焉然而佛宇僧寮尙未具也明年上復發帑金二千兩聖母所發贏其半諸宮各捐金有差以竟前績賜額曰護國永壽普陀禪寺仍遣隨往涖之隨奉上命惟謹拮据經理無日不身在土木間鳩材度工親雜徒庸爲伍乃以丙午秋月竣事丁未春上復遣御馬監太監党

禮頒帑金一千兩創碑示禁告土以畢役焉夫皇上
殷意茲役四發命三遣內臣積歲所資無慮數千金
棟宇巋巍金璧輝映鹿苑驚嶺有不得比盛者秋毫
皆上賜哉應賓東海波臣也樂觀厥成敢不對揚聖
天子之休竊惟大士以三十二應身入諸國土現八
萬四千臂目接引羣生而尤顯瑞於東海華嚴所說
善財南詢之處卽今所也佛本無相非相無以攝凡
心亦本不住非常住無以得衆止使知彼岸不遙梵
音非渺是以聖主當陽古佛出世總之綱維大化以
扶宇宙况乎屢朝供奉尤盛於茲綸綍旣赫輪奐斯

彰四方善信莫不俛首受戒修蒲團之理者列屋而
居輪香花之誠者蔽江而進豈盡神通之致哉亦崇
奉所自來矣緇白之流咸稽首崩角以贊功德於是
應賓掇管作記俾勒諸珉復繫以詩曰猗歟大士現
靈東方東有瀛海實度大荒黃金布地紫竹成行旣
宏瑞炬亦普慈航祖融爲厲梵宇斯殃崇法彰教是
維聖皇內帑旣發內遣惟良經之營之迄今八霜紺
宮更始寶相重光蓮花奕奕貝葉煌煌爰清爰淨彌
熾彌昌宏開壽域載啓樂邦是大功德不可思量敢
告來裔萬禩不忘

新建內官三公祠碑記

前人

夫衣冠之解紛不如巫媼之數語，龜楚之懲頑不如雷霆之一擊。人之趨於剽悍也，國法所不能制也。用大士之教，聳動而誘掖之，往往摧其邪心而發其善念。此西方之徒所以至今不廢，而普陀之在南海，屢廢屢興而未已也。自萬歷三十七載，朝廷使賫大藏詣各名山，普陀其一。維時祝融煽燄，紺宇一空。昔日招提勝地，鞠爲茂草。事聞上，遂命御用監太監張公亞泉賫帑金數千兩往董建焉。公賦性英敏，任事強毅，精通內典，工書法，歷官漢經廠，每爲國祝釐景命。

必斷茹葷絕酒飲恪持戒律以此當上心故有是役
公在事四載奉命謹如一日朝梵暮唄泊然自守了
不預世間事卽當道信使一不相通而其用世之才
又稍稍見於清寂之境寺僧數百人公視其老成者
執以事綜理寺務幼而敏者延師訓之啓以宗典大
士道場龍蛇雜處每有無義之徒視爲龍斷謀私利
以墜戒律主者孱弱莫敢誰何公甫下車而風輦望
風遠遁山寺爲之一清鼎新之後又博求儒紳輯爲
志乘以圖不朽此皆公之烈也維時再奉上命往來
南海一賁御製碑文一告土圓滿則有若御馬監太

監党公護持禁闕之中出入覆奏又捐白金千兩以助厥役則有若內官監太監馬公是皆有功於茲役烏可泯諸工成寺僧乃建生祠三楹於山後以祀三公語云無德不報此之謂已予不佞每登洛伽之巔慨然興歎以爲此山此寺之興匪獨大士之靈與皇上之德乃三公亦有勞焉故因寺僧之請而爲之記張公名隨順天文安人党公名禮陝西華陰人馬公名謙真定深州人

此萬歷丁未秋四明周公撰而僧如通等立石者今則改爲四監祠

供四人像張党馬之外一爲王臣臣與隨同差勅內止隨故文亦不及臣然臣副隨同董寺役効力日久

乃併祀之焉

重脩普陀志序

前人

普陀故有志茲載輯者何重鼎新也志者所以彰往
示來也惟是山川式靈又重之以王命其再造也將
必有廢興之迹焉雖載輯之可也普陀僻在一隅不
比中原透麗然而四大之一也天傾西北聖主御焉
地絕東南古佛出焉神道設教聖人不廢是宸翰所
護持也曷可泯諸蓋補陀古刹也興而廢廢而興者
數矣是舉也其鏤發諸內帑其工督諸內遣維壇宇
依如維名與制煥如是廢興一大際會也故曰雖載
輯之可也志凡爲卷者五爲類者十有七纂撮於諸

文學之手而不佞裁焉前志重在山要以顯佛靈今志重在寺要以尊君貺是是編之大指也敬表而叙之時在萬歷丁未四月旣望

重鑊補陀志序

鎮海 邵輔忠 尙書

補陀爲祝延名山著靈大士白華載於內典黑龍咒於梵音故無志也志輯於侯大將軍以汎海選勝置弋見聞彙列成帙今且嗣而鑊之矣以余所聞父老言補陀岬懸海上去邑三百里而遙外控諸夷貢舶孔道也然而代有隆替則時地刼會偶逢非大士慈靈代有覺迷也今上道揆在宥皇極建中廼廣孝治

奉兩宮慈旨遣中使頒經披繡祝延萬年而海宇屢
豐兵革不作於茲三紀福國庇民應若著蔡夫非冥
冥之所默祐也哉先是歲己亥前殿災薨礎具燼獨
大士金相自若而護法關神亦不毀此其故可曙已
今茲屢歷詔諭中使悉飭鼎新厥宇告竣也宜哉矧
其時汎舳艫諸島防援賁相望於滄溟鯨鯢無敢動
焉此實我皇靈伊濯孝慈昭假而大士如爲助流宣
化也志補陀者儻亦遵揚風美意乎故曰事不軌物
則君不舉焉言不微中則臣不獻焉苟其持之有故
言之成理君子嘗樂道之矣謹拜手序成志者寺僧

性能也併書之

渡海記事

漢陽尹應元浙江巡撫

大明萬歷三十一年癸卯夏五月督撫浙江都御史
漢陽尹應元視師海上時總戎都督僉事處州李承
勛簡銳卒數千以待聞補陀山峙大海中登此山則
諸凡險要可指顧而知又近歲聖母皇上屢遣內官
賫帑金重修梵宇經藏應元以爲百聞不博一見決
策往焉總戎具舟卒諦風潮訂行期海道副使同安
王道顯叅將蕪州袁世忠寧波府知府建安鄒希賢
同知金谿黃樸推官宜興何士晉定海縣知縣漳浦

朱一鶚悉從都御史以是月十三日解纜十五日抵
補陀旣焚香頂禮觀音大士遂歷海潮陟絕巘望滄
溟凝睇扶桑周咨海島真三生奇觀哉夫普陀海潮
寺等耳又同在一山海潮巨剎宛然恬不爲異而普
陀名號最著因災脩復殊非非常之原一旦重以天
子之命勢必竦動遐邇鯨波叵測偵備宜嚴乃屬叅
總各官整旅飭防聞警卽援永期寧謐萬萬弗遺君
父憂繇戎旣諸司分猷共念可爲一時之盛爰鐫石
紀歲月以告嗣來云

遊補陀記

鄧邑陸寶中書

補陀爲震旦名山之一孤懸海中水鄉衣帶殊不遠
徒以鹿鹿塵鞅守株繫匏未始向若而問津焉不幾
負盧敖汗漫耶今春二月風日晴美思得乘流縱棹
作三十年未了緣遂於月之戊申日上春發北郭是
日頗暄江干新柳被堤纖腰欲舉澄波縈帶甚佳沿
洄六十里至蛟川夜泊小港眠未定舟中告言勃谿
揚航進棹勢如雷動漏下四鼓泊金塘次早起觀海
日出空濛鏡光忽躍午發舟以風駛不得入翁洲從
曹家洋徑渡晚泊十六門月色陰晦子刻復發舟風
掀浪播從黑甜中行數十里渡蓮花洋志所稱鐵蓮

徧海者也味爽泊金鉢盂山望補陀如在睂際恨不能褰裳涉之時天雨如注上漏下濕幾以蓬牕爲甌傍午抵山衆僧林立祇候余挾兩蒼頭委蛇而行度白華嶺夾路多桃花間以雜樹輕紅淺碧相錯如繡行二里嶺盡爲蓮花池東爲放生池環池植柳成行蕭疎可喜池中皆白蓮花時尚未著莢萼枯莖戢戢如葦林池上跨以大石橋脩廣百武過橋歷數十石級爲寺門榜曰勅建護國永壽普陀禪寺蓋上命也時雨勢驟急余衫履半沾足力甚倦遂止宿白衣殿是爲月之十五次日庚戌始登殿肅禮大士緇素千

人合什胡跪幾無置足處殿後拾級而上傑閣五楹
貯今皇帝及聖母先後所賜兩藏經梵字金字經附
焉再上爲景命殿小憩東方丈住山性海來會海公
字無邊余戲謂是覺海耶苦海耶傍一客曰回頭卽
覺矣因相與大噱從方丈折而東上爲煙霞館有懷
闕亭苦茅爲之復下觀香積厨再下爲齋樓十三楹
可坐千人亦壯觀也是日雨乍淋乍歇山腰著霧如
巾已刻稍霽卽披衣納屐而行歷寺西數十武彌望
皆菜畦麥隴折而稍北路漸陟漸佳長松離立如人
路旁多樹木爲棚幽篁掩映仰不受日光忽有小塔

卓地雙扉隱隱自籬落間入客曰此金剛窟也窟負
一大石巖形如覆孟窟前後廊百武冠以岑樓四窟
楞楞峯黛可挹輕颺行竹樹中如琴筑通響余顧而
樂之有僧雛薦香茗一啜至盡別去經清籟菴啓後
閣看玲瓏石石皆散布林間有聳有仄有蹇有伏不
住一相石上多有雨點霜痕蟲涎鳥跡羃以脩藤五
色斑斕如花幢繡蓋頓覺太湖靈壁之勝移作耳目
近玩爲之惕然一食頃至西天門絕壁相夾中僅容
一人危石橫亘其上須僂僂乃得入直上爲圓通菴
有藏殿址稍西有石雨片疎特干雲題曰不二石過

此則脩竹菴矣菴居萬竹中密陰濃翠時時披拂軒
檻與塵世迴隔已從菴背小徑下仍行竹間歌古詩
竹逕通幽處不覺擊節至再因以其間問娑羅菴再
度一嶺爲梅灣是梅子真脩煉處有丹井迴公誅茅
其間名梅福菴余謂先賢名不宜直述因取孟亭之
義易爲梅仙菴題額而去里許遂至磐陀石石陡起
三十尺兩石相累如盤下銳上廣縫中可以引線亦
一奇也余躡竹梯而上時惟二客從焉僕夫俱狼顧
反走余因得縱覽海外若翁洲若桃花馬秦珍錯基
置蜿蜒巨浸中如渴虬欲飲驚濤忽張衆山俱動又

如駕六鼇而排風良可喜愕傍有二石如龜一蹲伏
巖上一蹶蹠而登作巢蓮狀甚肖自磐陀石折而南
下直百級爲法華洞洞在四山中嵌空刻露有石骨
倒懸挂地四周可環而走恨僧徒增設堵牆洞遂黝
黑又無炬火絕不見垂雲倒浪之奇大爲此山缺陷
還尋林樾巷會詩僧蓮區出巷循鳥道歷西方境踏
積翠而東忽有石屏昂立道左客大叫爲奇稍轉見
累石無算大者百堵小者盈拳高者凌蒼蒼下者傍
腰及趾攢聚獻狀出奇無窮爲蜃雲爲鯨波爲空中
樓閣爲千花塔爲九蓮臺爲赤城之霞峩峩之雪光

移景奪不可變視余從石林中宛轉目左右應接毛
豎膚栗屐齒迅不及停客復連叫不絕始知玲瓏石
所見僅豹文一變而已石壁多有鐫刻甚漶漫獨天
柱峯三字差強人意稍上爲育恩院楊都護所創曲
房小閣制甚精楚院西靈一泉磐石上有水穴盈尺
清泚可掬時漸昏莫月初升海嶠微雲點綴如五色
紋急曳杖東歸露瀼瀼已墜襟袖矣還至寺門月色
甚朗余縱步蓮花橋見東北最高頂一燈熒熒如明
星轉瞬漸大金光萬道散射羣峯翫鮮昱奕不可名
狀同遊者曰此佛光也相與歡喜贊歎遂止宿方丈

晨起小雨旋霽乃爲茶山之遊出寺門東看渡海紀
事碑折而北度几寶嶺下嶺爲玉堂街可列方軌無
崎嶇登頓之勞迂道入福源菴竹色頗佳再經禪那
菴右數折登智度橋有董玄宰勸緣碑筆法秀宕是
晉人本色過橋豎一木坊爲鎮海禪寺燬於火階級
柱礎猶存先聞有十丈傑閣亭亭逼霄漢而近金碧
璀璨爲一山冠惜未之見耳禮大士畢僧徒導入西
堂有大智禪師像清滿具足讀十大願碑因思智師
以行脚到山初無一椽蓋頂不十年而榛棘瓦礫之
區創爲莊嚴佛國至勤中使降香宰官聽法豈非靈

心定力爲如來之所印可者哉瞻禮而退飯於止閣
飯罷循東道而升攀崖陟巘險巖互值凡十餘里至
朝陽菴菴據茶山麓珍木圍繞綠蔭如城過此路益
陡絕錯趾益高余竦身獨上山童無草木可倚盡力
把滑始造其巔其名菩薩頂俯睇光熙妙應諸峯纍
纍如杯瓢覆積水上僧言雖三韓日本彷彿可指數
云恨是日陰霾僅見東霍山煙巒一抹餘者莽莽蒼
蒼空水難辨頃之風力愈緊耳後蕭蕭如箭黃霧四
塞張目不見曉客皆縮脰乃連袂趨下過華嚴菴秀
峯院又過一小院有僧祇園稱百千萬劫難遭遇機

鋒甚迅夜宿慧濟菴殿廡宏壯他處莫能及明發寒
甚至被褐煨火從菴左循牆北行可里許山脊忽斷
一線直下如懸梯千餘級稍住足復疾馳數轉煙深
草茂石勢齒齒來嚙人蹭蹬五里乃至宋公靜室中
結一團瓢翼屋一重位置甚常繞砌有泉一泓從石
罅出潺潺作細聲聞之清快又折而北山蹊迴疊如
風中浪紋乍起乍伏繞出茶山之背人跡所不至卽
巖岫亦大蕭索矣行數里始聞鳥聲有六七短松偃
蹇石上如趺坐僧再一轉忽見長松千頭彌山被谷
松下飛泉數道迸裂石壁聲噌吰下注絃張磬戛與

松籟相和余字之爲響水崖從此編蓬結屋可十餘處皆平平無奇又闌入沙磧中磴道絕級捫蘿禹步下及山之趾則龍樹菴矣菴背山面溪儘饒幽致復上至鎮海寺看飯僧僧俗幾六千人朗朗誦佛號杯羹盂飯相攫食如鳥鷲出寺別取逕東下是爲千步沙沙色布地如金畧不沾滯寬坦軟美又如鋪茵設席沙際海濤上春無風自雷亦一奇也又南行觀仙人井一坎甃丈餘水亦不甚冽復取故道歸宿白衣殿次日甲寅爲月之十九俗傳大士降誕拈瓣香上殿頂禮遂爲潮音洞之遊沿放生池東行數十步觀

太子塔元宣讓王所造凡四層頂高十丈瓏琢太湖石爲之有菩薩龍天像精巧絕倫傍鐫傳侍御零牙志文亦古雅轉而西南歷小坡爲普同塔欄砌甚工下入塔院訪西僧僧貌蒼儉用梵語誦尊勝咒一過亦不甚辨再上爲旃檀嶺間紫竹林林已失其故惟荒藤剝蘚存焉從此出而並海登捨身亭觀無梁鐵瓦琉璃三殿址遂至潮音洞洞傍奇石四布無寸木尺土中忽分坼如人張兩頤洞脚斜插海底潮聲晝夜來撻擊如獅吼響鳴潮音之得名以此也上有通穴天窻余伏而下窺則洞中石色紫絳多作鳥篆龍

文洞口有物橫亘如闌僧言是佑客所布大士橋凡
百日爲海風飄墜云頃之忽有蓮花二莖湧出波面
水粼玉質瑩徹分明豈白衣示現之兆耶乃知志所
稱七寶雙牙亦不盡誣也洞前爲娑竭羅龍宮余因
而問所爲毛跳石求現臺不過岑巒中小小示異者
耳西有善財洞以南詢得名石坼處差小亦深宵不
可測崖上珠泉滲滴不斷可取療目眚是爲菩薩泉
或曰慧泉自潮音洞越石塹而西平沙曼衍中爲淨
土菴菴正對蓮花洋景甚空濶是日有戈船千艘蔽
空而進碧油紅幟星分鳥張與銀屋雲山相綯發真

不減橫槩賦詩景也觀罷復陟一小嶺由間道趨總
靜室是夜宿脩竹菴擬觀旭會雲霧不果乃秉燭辭
大士出天門還經白華嶺入白華菴爲昱光和尚手
創朱扉畫壁種種佳麗菴後依山結小茨有青石數
片可撫可踞得與韻人高衲披襟長嘯謾謾當松下
風亦一快事也半晌潮平遂乘舟而返東風借便一
晝夜抵郡城矣是遊往返八日舍筏携筇幾盡一山
之勝獨清淨亭有宋景濂碑銘已委之荒煙蔓草而
不可拾達摩峯有松雪題跡亦倦勤不及登眺他若
大雪浪小茶山摩尼洞惜乎交臂而失之餘興堪乘

須後舉耳山靈有知請無以此謝逋客

普陀山修路碑記

華亭 董其昌 尚書

普陀在大海中開闢之始卽有靈山奇與之區未成
坦道彼負好奇之癖挾濟勝之具者故自忘其跋涉
之艱也其如齋香花而皈命兼膜拜以奔趨者何哉
嗟夫驚魂甫定繭足爲虞彼岸方躋故步恐失高高
下下無平不陂兩兩三三欲前且卻卽不至青柯坪
昌黎漫試之悔亦足灰桃花源漁父再訪之心白華
菴主朗公於是有修路之議雖然破混沌之大荒布
平治之月令補名山之缺陷振積刼之因循談何容

易也乃朗公興無緣慈謀不請友雖口不名一錢袖
不懷一刺而直以戒行勝以真心感畚耒繁興衆緣
輪輳爲石之工十有七爲土之工十有三綿亘五里
星霜四周昔之犖确交加荆榛翳塞者皆已變爲周
行夷然魯蕩竟不知布金之長者遇在何方撤石之
愚公勸者誰氏猶之陽春雪曲屬和更多優曇鉢花
開敷甚速朗公曰大士加被之力也予何有焉佛事
門中此爲最勝矣昔佛沙伏國旣建寶塔卽埋珠網
立石於旁刻銘詔後將使異時修塔不煩大衆捐貲
夫財施仰法施而就前事爲後事之師顧予蕪詞有

慚珠網耳朗公名性珠叅學師承之詳別有傳者不
具書銘曰吾聞善逝語想澄成國土心如路亦如因
果無乖誤一墜人我坑千載永不寤人勞我佚居人
馳我偃卧各各不相關各各不相護縱得空行仙脚
脛亦可剉偉哉龍象侶度人如自度瞠目雲霄寬滌
腸冰雪吐以我戒德香薰彼信心固一行鳩僇功七
寶階可數猶如獅子兒全力以捉兔衆檀響應聲大
士隨緣赴覆以光明雲灑以楊枝露當來踵修者認
此菩提路

普陀朗徹禪師脩妙莊嚴路記

華陳繼儒徵君

東南水中之勝江有金焦太湖有七十二峯不敢與
南海普陀鼎立而三非遜百谷王以觀音大士道場
勝也上自后王君公之使以及老穉緇黃越枝千里
杭葦破浪來朝禮一瓣香於此膜拜涕洟伏地不能
起雜施錢穀布帛衣服針紉之屬巖居學道者亦往
往微有所濟獨捨舟登岸嶢嶢崎嶇雨虐風饕之夕
步步歌行路難矣明徵璩公歎曰昔雪山布髮掩泥
持地以身負土石賢聖皆然而區區一貧衲敢不負
鍾先之乎發誓願捐鉢費薙草萊刊土石不募而聞
聲者如鳥就巢不召而樂赴者如蟻壘垤經始於天

啓丁卯落成於崇貞庚午自道頭茶菴至白華菴西路濶二丈階高三丈菴前平坡十餘丈進山門曲徑竹廊至白衣真應殿東達普陀寺路長四五里有茶亭自度亭可以憩有兩旁雜樹可以蔭有臺可以眺有山田野花可以玩有石几可以坐履道坦坦比之泥滑滑者何如掉臂而入比肩而出不下車不讓畔比之五步一喘十步一蹶者何如至是而朗公之功德鉅矣朗公曰吾師昱光老比丘刺血書經上疏闕廷請勅建本寺上賜帑金賜御製碑文賜金爛紫袈裟吾師悉遜不有若珠之畚石鋤土何足挂有道齒

類乎陳子曰吾師劉貢父詩云欲行今日路恐背古人跡欲行古人路今人笑迂僻噫嘻異哉吾與朗公從何處下註脚况世路願太奢則缺陷難填量太隘則狹竄難廣氣太橫則突兀難夷心太曲則險巇難經要路危岐路錯末路迷此楊朱嵇叔夜所爲望而泣下者也安得大善知識如朗公輩布滿人間以平不平之心路乎心路乎世路平無論山中卽遊戲風波蛟龍大海此與康莊魯道何異哉敬以復朗公并作妙莊嚴路記

大智禪師傳

古叟
彝提居士

大智禪師名真融楚之麻城人也幼有慧性年十五
捨身本境定慧寺爲沙彌侍師數年潛心教典一日
幡然曰達磨九年面壁師何人哉我將鉢遊名山隨
處結緣然後退而止觀吾願畢矣於是辭定慧抵建
康依牛首山嘉靖戊申居燕京崇國寺同衆誦法華
越數月至萬壽山受戒具已入五臺山禁步五年愈
益精進甲寅往伏牛山石叢林中煉磨三年持行益
苦丁巳還楚寓會城龍華寺轉經明年入蜀住栽脣
山頂禁步一十二年建藏經閣於淨土菴接待十方
僧衆今上改元之二年又止鑒華山山在蜀省北而

峩嵒在南師見朝山者山路險遠風雨不時欲爲憇
息之所而難其基或語之曰山椒下有池昔明本祖
師跌坐於此池中往往現金蓮花及金色鴛鴦遂得
名云池上平行可建道場師大喜往視果然遂夷石
爲址伐木爲材不一二年成一大精舍遂因其地名
金蓮菴自此來朝山者有所止息饑者食焉渴者飲
焉寒者火焉暑者蔭焉無不感悅而去已乃修千佛
閣晝夜課誦不輟與峩嵒之淨土同既而復念震旦
三大道場五臺峩嵒已獲朝參至於南海普陀我佛
觀世音說法之地可勿至乎遂以萬歷庚辰渡海抵

小白華叩禮金容大慰夙願自謂托迹寶陀舖糜喫
菜了此生矣已而尋紫竹旃檀叩潮音靈洞履金沙
之的皪聽海潮之鏗訇回首淨土金蓮復作如是念
乃思築菴於光熙峯之麓精誠所格善信皈依衆不
啻施工勤於趨於是結樓數楹坐卧觀滄海日出後
爲大士精舍命之曰海潮蓋視我肩輦華之勝果大
都不相遠也往余從海內薦紳先生及閒士長者游
輒稱大智師曰是上乘僧也余蓋雅慕之云頃余泛
海首謁寶陀卽詣海潮邂逅吾師大爲愉快因叩其
中真淵淳谷虛一塵不染良久余別去師出一簡示

余曰此真融平生行腳蹤跡也真融苦行六十年豈敢希圖作佛但願與三寶結緣成人天小果耳今老矣將止是山中衣一衲飯一盂待寂於斯焉耳疇昔之夜有授夢於融者曰旦日有髮僧來與汝有緣寤而異之今居士儼然惠顧恰與夢符是以有請居士其惠我一言余思吾師於佛氏之教少而習焉長而悟焉老而篤焉而於苦空無著之旨非惟知之亦允蹈之故始而屏屑糲而瑩華皆若蟬蛻然此其心何嘗有所繫吝於中哉乃今之海潮則自謂止於斯矣彼昔所謂退而止覲者其言爲不誣矣昔有百丈今

有融公皆稱大智無乃非前後身耶余方外之緣豈
偶然哉因卽師所示簡叙次如右爲大智禪師傳

重修南海普陀山志卷之十四終